

"CLARIVIDENTE": ARTE RUBIANO TA BRIYA RIBA ESCENARIO INTERNACIONAL

December 15, 2024

"Clarividente" (Afterlight) 2024 ta un art performance presenta p'e artista multidisciplinario Alydia Wever oficialmente riba diadomingo 24 di november 2024 p'e finissage di e exposicion di arte internacional di European Cultural Center di Italia na Venezia, titula "Personal Structures, Beyond Boundaries" na Palazzo Mora pa ciere di e 60 Biennale di Venezia na Italia, titula "Foreigners Everywhere".

E art performance aki ta parti di e video art cu ta un colaboracion conhuntamente cu artista Ryan Oduber cu a filma, saca potret y a edit e video aki. Tambe a selecta "Clarividente" video art for di un cantidad grandi di diferente video impresionante conhuntamente cu 14 otro video art y tambe como un di e 28 artistanan internacional invita p'e presentacion oficial di e festival cu a nace na Venezuela 20 aña pasa dirigi p'e artista/museologo Andreina Fuentes Angarita, presidente di Arts Connection Foundation, tambe coordinacion general ta bao di encargo di museologo y historiador di arte Milagros González.

P'e di 20 aniversario di Miami New Media Festival di 2024 "Clarividente" como un di e seleccionnan oficial, tambe a exhibi e video arte aki banda di un lista increibel di obra di arte di artista talentoso den e exhibicion titula "Fin del Cuento (End of Story)" y tabata fin su apertura ariba diasabra 12 di october 2024, na Arts Connection Foundation Gallery, 676 NW 23 St, Miami FL 33127 na Merca.

Un exhibicion cu a cuminsa su gira internacional y caba na Venezuela na e ciudad di Barquisimeto na estado Lara na Barquisimeto Golf Club/ Espacio- Galería "Félix Otamendi Osorio" bao di produccion di Curador Al Vanegas cu despues a sigui p'e ciudad di Mérida, estado di Mérida y a ser ricibi na e "Espacio Proyecto Libertad" bao di produccion di e Curadora Elizabeth Marín de Hernández, despues e festival a traslad'e p'e ciudad di San Cristóbal, di estado Táchira y sigur tabata bon ricibi na "Fundación Cultural Bordes/ Galería-Café Bordes" bao di Curadora Fania Castillo.



Riba diadomingo 17 di november e exhibicion aki a habri na ciudad di Maracaibo na estado Zulia y ricibi na "El Anter vol 3" cu ta un evento produci pa Coolto Agency y productor Alejandro Calmen. Miami New Media Festival lo continua su gira internacional otro aña na 2025, y lo culmina den Caribe reafirmando su impacto internacional.

E gira internacional ta bao produccion general di Jimmy Yáñez, representante di Miami New Media Festival para el Caribe continental e insular.

Miami New Media Festival den e contexto di Biennale di Venezia

European Cultural Center di Italia na Venezia a invita Miami New Media Festival pa celebra grandemente su aniversario di 20 aña di existencia pa den e contexto di e 60 International Art Exhibition di La Biennale di Venezia. Aki a ser presenta un seleccion di video art di artista nan sobresaliente cu ta parti di e biahe historico di e Festival aki. Miami New Media Festival tabata tin tres loop cu 9-10 video/loop como parti di e exposicion di "Personal Structures" Beyond Boundaries for di diarason 20 di april te cu diadomingo 24 di november 2024, na Palazzo Bembo (sala G).

Alydia Wever y Ryan Oduber

Den e di dos loop, for di diasabra 21 di juni te cu dialuna 30 di september 2024, a seleta y presenta e video-art titula "E La Guli Su Lengua" 2020. E video art aki ta parti di e solo exposicion "Mi No Tin Palabra" presenta pa artista Alydia Wever na Stichting Rancho na Visstraat 1, na fin di juli di 2021 como parti di e celebracion di 200 di Oranjestad Aruba.

Den luna di april di 2024 ariba diabierna 26, diasabra 27 y diadomingo 28 na WGGKunst na Amsterdam Hulanda, tabatin e presentacion di e exhibicion di Miami New Media Festival su 20 aniversario titula "REPAIR". Aki un grupo di artista internacional selectat p'e curador y artista Hugo Palmar for di e opencall y tambe diferente artista invita pa presenta nan obra di video art. "Dilanti di Biento" 2023 di e artistanan Alydia Wever y Ryan Oduber invita como parti di e grupo di exhibicion y riba diadomingo 28 di april n'e localidad di e exhibicion WGGKunst tabatin e artist talk, unda cu conhuntamente cu diferente otro artista cu tambe a presenta nan video art, a comparti esaki cu e publico presente n'e atardi di informacion artistico aki. Tabatin artista cu a conecta online y cada un presente a splica nan concepto, idea y con e proposicion di cada un di nan lo a tuma luga cu e tema y e uzo di medio nobo como un recurso expresivo. Kico ta reparacion? Con bo ta conecta esaki cu bo proposicion?

24.11

15-16h

**Clarividente
(Afterlight) Year 2024
by Alydia Wever**
Palazzo Mora

Performance

Artista Alydia Wever y Ryan Oduber a expresa nan gratitud inmensamente specialmente na artista/museólogo Andreina Fuentes Angarita, coordinacion y curadornan di Miami New Media Festival, tambe hopi contento y sigur inmensamente agradeci n'e organizado Sara Danieli y director di arte di European Cultural Center di Italia na Venezia, na WGKunst/ Hugo Palmar na Amsterdam, Jimmy Yáñez, representante di Miami New Media Festival pa Caribe Continental y Insular, y Mondriaan Fonds pa nan continuo sosten y ayudo grandemente. Sin lubida famia, amigo y conoci cu semper ta presente unda cu e duo artista Rubiano aki presenta.